

IBIZAMINI BISOZA IGIHEMBWE CYA 3

IKICIRO CYA:

KABIRI CY'AMASHURI YISUMBUYE

AMASHAMI:

UMWAKA WA 4 INDIMI (LFK & LKK)

IGIHE KIMARA:

Amasaha 3

AMANOTA:

..... / 100

AMABWIRIZA

1. Ntufungure iyi kayi y'ibibazo by'ikizamini utabiherewe uburenganzira.
2. Ikizamini kigizwe n'ibibazo **makumyabiri (20)** n'ibice bine by'ingenzi:
Igice cya mbere: Kumva no gusesengura umwandiko **(amanota 30)**
Igice cya kabiri: Ikkibonezamvugo **(amanota 25)**
Igice cya gatatu: Ubumenyi rusange bw'ururimi **(amanota 30)**
Igice cya kane : Ihangamwandiko **(amanota 15)**
3. Ubahiriza itonde ry'ibibazo uko bikurikirana.
4. Subiza muri make utarondogoye.
5. Gusiribanga, guhindagura no guhuza ibisubizo na mugenzi wawe cyane cyane ibipfuye bifatwa nko gukopera cyangwa gukopezwa.

INGAGI N'UBUKERARUGENDO

Mu bukungu bw'igihugu, bakunda kuvugamo cyanecyane amabuye y'agaciro acukurwa n'amariba ya peterori. Nyamara kuri ubu, ubundi bukungu kimeza bumaze gutezwa imbere mubihugu byinshi bushingiye ku bukerarugendo. Ngayo amashyamba abikiriye inyamaswa zashize mu zindi ntara z'isi, ngibyo ibiyaga n'inkombe ziriho agasenyi gashyushye, ngibyo ibirunga nyamuraza bicumbeka iyo ijoro ryiroshye cyangwa bikavumbura amahindure. Ubwo bukungu bushingiye ku bukerarugendo ni bwo tutabuze mu Rwanda. Ishyamba ry'Akagera n'inyamaswa z'akangari zirituye, ibiyaga byuzuye amafi n'imvubu, biteye amabengeza. Ishyamba ryo mu birunga ribamo inguge zitwa "ingagi" zashize mu zindi mpande z'isi.

Ingagi ni yo nguge isa n'umuntu kurusha izindi. Ingagi zirimo amoko abiri y'ingenzi: izo ku nkcombe y'imigezi ziboneka muri Kameruni no muri Santarafurika n'izo mu misozi miremire zisigaye mu cyanya k'ibirunga honyine. Ingagi ishobora kugira uburebure bwa metero ebyiri igapima ibiro 250. Ifite amatwi asa cyane n'ay'umuntu; amaso yayo ni mato, aregeranye kandi arahenengeye, naho izuru ryayo rirabwataraye cyane. Nta murizo igira nk'izindi nyamaswa. Kimwe n'umuntu, ingagi zigira amenyo 32, ariko amabwene yayo agatema cyane n'ibantu bikomeye. Igira ubwoya bw'ikijuju, uretse mu maso no mu gituza. Ishobora kugendesha amaguru abiri n'ubwo kenshi igendera kuri ane. Ingagi zikunda kubana ari nka 15 cyangwa 20, zikayoboka ingabo irusha izindi amaboko. Zirirwa zimuka zishaka ibyo zirya, bwakwira zigasasa zikaryama, ingabo hasi, ingore n'inzana mu biti. Iyo zitewe, zigerageza gukura umutima ikiziteye, zigahonda ku gituza nk'uvuza ingoma zinasakuza cyane. Muri icyo gihe na zo zishobora kurwana.

Ingore ihaka amezi ikenda, ikonsa arindwi cyangwa umunani. Agahinja karahagatirwa, kamara gufatika kagahekwa. Kubyara impanga ntibikunda kubaho mu ngagi. Muri iyi myaka, hari ba rushimusibifuza gutega ingagi ngo bazijyane kuzikoreraho ubushakashatsi. Abo ni abajura ntibateza u Rwanda imbere.

Hakaba n'abandi nka Nyakwigendera Diane FOSSEY biyemeje kudufasha kuzirwanaho. Nitubatere ingabo mu bitugu, tugirira ko izo ngagi ari izacu zikaba

zinasa natwe kandi zikaba zinakamwa amadevize atuma igihugu cyacu gitera imbere. Tuzireke zisanzure mu Rwanda rwacu tunazisure tumenye uko zibaho.

IGICE CYA MBERE: KUMVA NO GUSESENGURA UMWANDIKO (amanota 30)

- 1) Uyu mwandiko ni bwoki ki? Sobanura igisubizo cyawe. **(amanota 2)**
- 2) Ni ayahe mashyamba avugwa muri uyu mwandiko? **(amanota 2)**
- 3) Ayo mashyamba afitiye Abanyarwanda kamaro ki? **(amanota 2)**
- 4) Rondora ibyiza bireshya ba mukerarugendo bivugwa muri uyu mwandiko. **(amanota 3)**
- 5) Mu bikurura ba mukerarugendo, ingagi ifite uwuhe mwihariko? **(amanota 2)**
- 6) Gereranya imiterere y'ingagi n'iy'umuntu (ibantu bitanu byibuze). **(amanota 5)**
- 7) Ingagi ziryama he? Utekereza ko ari ukubera iki? **(amanota 3)**
- 8) Ni ba nde bashaka kubangamira ingagi? Bashobora gusohoza imigambi yabo? Kubera iki? **(amanota 2)**
- 9) Uretse ingagi, vuga ubundi bwoko bw'inguge uzi. **(amanota 4)**
- 10) Sobanura amagambo akurikira ukurikije inyito afite mu mwandiko:
(amanota 5)
 - (a) Inyamaswa akangari
 - (b) Ubukerarugendo
 - (c) Kubikira
 - (d) Icyanya
 - (e) Iyo ijoro ryiroshye

IGICE CYA KABIRI: IKIBONEZAMVUGO (amanota 25)

- 11) Amagambo yanditse atsindagiye ni bwoko ki ? **(amanota 6)**
 - (a) Nasanze **ibyiza** babimaze.
 - (b) Serugarukiramfizi **yari** umushumba **rwoma**.
 - (c) Ni **gake** ngera i Kigali.
 - (d) Bihakane **se** turebe!
 - (e) **Apu!** Uriya ni imbwa gusa!
- 12) Tanga ingero z'amazina aboneka hakoreshejwe ikomorazina mvazina ku magambo akurikira : **(amanota 4)**
 - (a) Umugabo

- (b) Inka
- (c) Ijisho
- (d) Umugano

- 13) Erekana uturango twa ntera wifashishije ingero. **(amanota 8)**
- 14) Mu nteruro ikurikira, garagaza : **uburyo, igihe, ngenga, indango, ijyana, irebero n'ingiro** by'inshinga itondaguye. **(amanota 7)**
Igikakarubamba kivura indwara nyinshi.

IGICE CYA GATATU: UBUMENYI RUSANGE BW'URURIMI (amanota 30)

- 15) Andika imigani y'imigenurano yerekana ko: **(amanota 5)**
- (a) Kutumvira ababyeyi bizana ingaruka.
 - (b) Abana bakwiye kwita ku babyeyi babo no kubafasha bageze mu zabukuru.
 - (c) Umwana ubuze nyina akiri muto ababara, akagira ubuzima bubi.
 - (d) Ibyago bisimburana n'ibindi byago, ibibazo bikurwa n'ibindi bibazo.
 - (e) Umuntu w'umukene naho yavuga ijambo ryiza nta wuriha agaciro.
- 16) Erekana impande enye z'ingenzi zigize ikiganiro mpaka. **(amanota 4)**
- 17) Tanga ingero eshanu (5) z'ubuvanganzo nyemvugo bwo muri rubanda. **(amanota 5)**
- 18) Mu bisakuzo : **(amanota 8)**
- (a) Tanga imimaro itatu y'ibisakuzo mu buzima bwa buri munsi.
 - (b) Andika ibisakuzo bica mu buryo bukurikira :
 - (i) Igisabo
 - (ii) Ikirago
 - (iii) Isekuru
 - (iv) Imyugariro
 - (v) Ifundi

19) Ubutinde n'amasaku: **(amanota 8)**

- (a) Tandukanya amagambo yandikwa atya ukurikije ubutinde n'amasaku kandi ugabanya ibimenyetso
- ibiro(bakoreramo)≠ (uburemere)
 - gufungura (urugi)≠ (kurya)
 - ubwenge (imyobo mito)≠(ubuhanga)

(b) Andika interuro ikurikira ugaragaza ubutinde n'amasaku kandi ugabanya ibimenyetso:
Umusore n'umukobwa baje.

IGICE CYA KANE: IHANGAMWANDIKO (amanota 15)

- 20) Hanga umwandiko mvugamiterere ugaragaza imiturire y'aho utuye.
Nturenze imirongo makumyabiri n'itanu (25).

.....**IHEREZO**.....

IMBONERA Y'IKOSORA (S4 INDIMI)

IGICE CYA MBERE: KUMVA NO GUSEENGURA UMWANDIKO (amanota 30)

- 1) Uyu ni umwandiko mvugamiterere, **(1)** uragaragaza ibyiza bikurura ba mukerarugendo mu Rwanda muri rusange, hanyuma bakibanda ku miterere y'ingagi. **(1) (amanota 2)**
- 2) Muri uyu mwandiko haravugwa ishyamba ry'Akagera **(1)** n'ishyamba ryo mu Birunga. **(1) (amanota 2)**
- 3) Ayo mashyamba acumbikiye inyamaswa**(1)** ba mukerarugendo baza kureba bakishyura amafaranga. **(1) (amanota 2)**
- 4) Ibyiza bireshya ba mukerarugendo bivugwa muri uyu mwandiko ni amashyamba abamo inyamaswa zashize mu zindi ntara z'isi, **(1)** ibiyaga n'inkombe ziriho agasenyi gashyushye, **(1)** n'ibirunga. **(1) (amanota 3)**
- 5) Ingagi yo mu birunga ifite umwihariko ko ba mukerarugendo nta handi ku isi bayisanga**(1)** uretse mu Rwanda honyine. **(1) (amanota 2)**
- 6) Kugereranya imiterere y'ingagi n'iy'umuntu: **(amanota 5)**
 - Ingagi ifite amatwi nk'ay'umuntu. **(1)**
 - Igira amenyo mirongo itatu n'abiri nk'umuntu **(1)**
 - Nta murizo igira **(1)**
 - Ishobora kugenda ihagaze nk'umuntu **(1)**
 - Ingagi y'ingore ihaka amezi ikenda **(1)**
 - Ihagatira umwana wayo cyangwa ikamuheka nk'uko bimeze mu bantu.
 - Zisasa aho ziryama.
- 7) Ingagi z'ingabo ziryama hasi, **(1)** ingore n'inzana zikaryama mu biti. **(1)** Ni ukugira ngo niziterwa ingabo zihite zitabara. **(1) (amanota 3)**
- 8) Abashaka kubangamira ingagi ni ba rushimusi bifuza gutega ingagi ngo bazijyane kuzikoreraho ubushakashatsi. **(1)** Imigambi yabo iburizwamo n'abantu biyemeje kuzirwanaho. **(1) (amanota 2)**
- 9) Ubundi bwoko bw'inguge : Igitera, **(1)** inkende, **(1)** Icyondi, **(1)** inkima**(1)** **(amanota 4)**
- 10) Gusobanura amagambo hakurikijwe inyito afite mu mwandiko : **(amanota 5)**
 - (a) Inyamaswa akangari : Inyamaswa zitagira umubare, nyinshi cyane. **(1)**

- (b) Ubukerarugendo : Ingendo abantu bakunda gukora mu gihugu cyabo cyangwa mu bihugu by'amahanga bihera amaso ku byiza bahasanze. **(1)**
- (c) Kubikira : Ni ukuguyaguya umwana kugira ngo asinzire. Hano bishatse kuvuga ko mu mashyamba y'u Rwanda inyamaswa zifashwe neza. **(1)**
- (d) Icyanya : Ni ahantu h'ishyamba cyangwa h'umukenke inyamaswa zikunda kwibera. **(1)**
- (e) Iyo ijoro ryiroshye : Iyo ijoro rigeze, riguye. **(1)**

IGICE CYA KABIRI: IKIBONEZAMVUGO (amanota 25)

- 11) Ubwoko bw'amagambo atsindagiye: **(amanota 6)**
 - (a) **ibyiza**: izina ntera **(1)**
 - (b) **Yari**: inshinga nkene/ mburabuzi**(1)** **rwoma**: igisantera **(1)**
 - (c) **gake**: umugereka w'inshuro **(1)**
 - (d) **se**: Akamamo **(1)**
 - (e) **Apu!** Uriya ni imbwa gusa! Irangamutima **(1)**
- 12) Ingero z'amazina aboneka hakoreshejwe ikomorazina mvazina: **(amanota 4)**
 - (a) umugabo : abagabo, ikigabo **(1)**
 - (b) inka : agaka, ibika **(1)**
 - (c) ijisho : akajisho, ikijisho **(1)**
 - (d) umugano : urugano **(1)**
- 13) Uturango twa ntera wifashishije ingero: **(amanota 8)**
 - Ntera igaragira izina : Umugabo munini **(1)**
 - Ntera isobanura izina igaragiye : Icyatsi kibisi **(1)**
 - Ntera ijya mu nteko zose: Umwana **muto**, inzu **nto**, ahantu **hato** **(1)**
 - Ntera yisanisha n'izina igaragiye **umugore mugufi.** **(1)**
- 14) **Igikakarubamba kivura indwara nyinshi.** **(amanota 7)**
 - Kivura : uburyo : ikirango **(1)**
 - Igihe : indagihe **(1)**
 - Ngenga : ya 3 ubumwe **(1)**
 - Indango : yemeza **(1)**
 - Ijyana : nyacyuzuzo **(1)**

Irebero : nkomeza **(1)**

Ingiro : nkora **(1)**

IGICE CYA GATATU: UBUMENYI RUSANGE BW'URURIMI (amanota 30)

15) Imigani y'imigenurano yerekana ko: **(amanota 5)**

- (a) Kutumvira ababyeyi bizana ingaruka. Utumviye se na nyina yumvira ijeri. **(1)**
- (b) Abana bakwiye kwita ku babyeyi babo no kubafasha bageze mu zabukuru. Urukwavu rukuze rwonka abana. **(1)**
- (c) Umwana ubuze nyina akiri muto ababara, akagira ubuzima bubi. Iyo inkoko ivuye mu magi arabora **(1)**
- (d) Ibyago bisimburana n'ibindi byago, ibibazo bikurwa n'ibindi bibazo. Agahinda gashira akandi ari ibagara **(1)**
- (e) Umuntu w'umukene nahoh yavuga ijambo ryiza nta wuriha agaciro. Uwambaye injamba ntagira ijambo. **(1)**

16) Impande enye z'ingenzi zigize ikiganiro mpaka: **(amanota 4)**

- Abashyigikiye insanganyamatsiko **(1)**
- Abadashyigikiye insanganyamatsiko **(1)**
- Umuyobozi w'ikiganiro **(1)**
- Indorerezi **(1)**

17) Ingero eshanu (5) z'ubuvanganzo nyemvugo bwo muri rubanda: **(amanota 5)** imigani miremire, **(1)** insigamigani, **(1)** imigani migufi cyangwa imigenurano, **(1)** indahiro, **(1)** ibitekerezo bya rubanda, **(1)** ibisakuzo, ibiyivugo by'amahomvu, amahamba, amahigi, amasare (indirimbo z'abasare), amagorane, ibitongero (mu kuragura, guterekera, kuvura, kugombora...), indirimbo z'imandwa, imbyino, ibihozo (iby'abana n'iby'abageni), ibyidogo by'abahinzi b'ubudehe cyangwa abandi bantu bitabiriye umurimo wa rusange...

18) Mu bisakuzo : **(amanota 8)**

- (a) Imimaro itatu y'ibisakuzo mu buzima bwa buri munsi : Ibisakuzo bifasha abana ndetse n'abakuru gukora imyitozo mfuturamvugo igamije kubamenyereza gutekereza, **(1)** kuvuga badategwa no kumenya gufindura

imvugo zidanangiye kandi bikabatoza umuco **(1)** ndetse
bikanabamenyesha amateka. **(1) (amanota 3)**

(b) Andika ibisakuzo bica mu buryo bukurikira : **(amanota 5)**

(i) Igisabo : Mama arusha nyoko amabuno Manini **(1)**

(ii) Ikirago: Mama nshuti **(1)**

(iii) Isekuru: Mfite umukobwa wange uje wese adumbamo **(1)**

(iv) Imyugariro: Abana bange barara bahagaze bwacya bakaryama **(1)**

(v) Ifundi: Abana bange bangana bose **(1)**

19) Ubutinde n'amasaku: **(amanota 8)**

(a) Gutandukanya amagambo ukurikije ubutinde n'amasaku: **(amanota 6)**

- ibiro**(1)** ≠ ibirô **(1)**

- gufuunguura **(1)** ≠ gufuungura **(1)**

- ubweênge **(1)** ≠ ubwêenge **(1)**

(b) Kwandika interuro ugaragaza ubutinde n'amasaku: **(amanota 2)**

Umusôre n'ûmukoôbwa baaje.

IGICE CYA KANE: IHANGAMWANDIKO (amanota 15)

20) **Guhanga umwandiko:**

Imiturire y'aho ntuye (amanota 15)

Imisusire: (imbata, isuku n'imigaragarire, inozamvugo, uburebure
n'imyandikire) **(amanota 7)**

Zimwe mu ngingo zagaragazwa: (amanota 8)

- Imiterere y'aho hantu (mu kibaya, ku musozi...)
- Aho ari ho (aho haherereye mu mbibi z'imitgekere y'igihugu)
- Imybakire (umudugudu, akajagari...)
- ibyiza nyaburanga bihari (imisozi, amashyamba, ibiyaga..)
- ibikorwa remezo (amazi, amashanyarazi, imihanda, amashuri...)

Ikitonderwa: Ingingo isobanuye ihemberwa **amanota 2**

IKINYARWANDA

**Itariki :21/06/2022
Isaha : 14h00-16h00**



IBIZAMINI BISOZA IGIHEMBWE CYA 3

IKICIRO CYA:

KABIRI CY'AMASHURI YISUMBUYE

AMASHAMI:

**UMWAKA WA 4 AMASHAMI YOSE ATARI
AY'INDIMI**

IGIHE KIMARA:

Amasaha 2

AMANOTA:

..... /40

AMABWIRIZA

1. Ntufungure iyi kayi y'ibibazo by'ikizamini utabiherewe uburenganzira.
2. Ikizamini kigizwe n'ibibazo **icumi (10)** n'ibice bitatu by'ingenzi:

Igice cya mbere: Kumva no gusesengura umwandiko (**amanota 15**)

Igice cya kabiri: Ikkibonezamvugo n'Ubumenyi rusange bw'ururimi
(amanota 15)

Igice cya gatatu : Ihangamwandiko **(amanota 10)**

3. Ubahiriza itonde ry'ibibazo uko bikurikirana.
4. Subiza muri make utarondogoye.
5. Gusiribanga, guhindagura no guhuza ibisubizo na mugenzi wawe cyane cyane ibipfuye bifatwa nko gukopera cyangwa gukopezwa.

KAMI KA MUNTU NI UMUTIMA WE

Uyu mugani, bawuca iyo babonye umuntu yiyemeje kwihitiramo icyo bamwe bamubuza; ni bwo bagira, bat: «Kami ka muntu ni umutima we nimumwihorere». Wakomotse kuri Muhangu wo mu Mvejuru (Huye) ku ngoma ya Mibambwe I Sekarongoro I Mutabazi I ahasaga umwaka wa 1400.

Kuri iyo ngoma, hariho umugabo wo mu bwoko bw'Abakobwa akitwa Muhangu, akaba umupfumu wa Mibambwe Sekarongoro. Muri ubwo bupfumu bwe, yari akubitiyeho n'ubutoni bunini kuri shebuja. Bukeye, umwe muri baka Mibambwe asama inda, imaze gukura Mibambwe ategeka abapfumu be kugisha, kugira ngo barebe aho umugore we akwiye kuzabyarira. Abapfumu bajyana imbuto y'uwo mugore bararagura. Abenshi bemeza ko akwiye kubyarira mu Cyambwe (ahahoze ari muri Gitarama); Muhangu wenyine yemeza ko akwiye kubyarira mu Bitagata bya Muganza (na ho hahoze ari muri Gitarama). Bavuye mu rugishiro (aho abapfumu bateranira baragura), baza kuvuga uburyo imana zagenze. Bageze kuri Mibambwe, bat: «Twese twemeje ko umugore wawe akwiye kuzabyarira mu Cyambwe; bat: «Keretse Muhangu wenyine ni we wereje ko akwiriye kubyarira mu Bitagata bya Muganza! » Kubera ubutoni bwa Muhangu, bituma Mibambwe yemera mu Bitagata bya Muganza.

Nuko muka Mibambwe bamwohereza mu Bitagata kwaramirayo. Haciyeho iminsi, agiye ku nda arananirwa arapfa. Abapfumu bereje ko yabyarira mu Cyambwe baba baboneyeho urwaho rwo kurega Muhangu wabarushaga ubutoni; dore ko nta muhakwa ukunda undi. Babwira Mibambwe, bat: «Nta kindi kishe umugore wawe; yishwe na Muhangu watumye ajya kwaramira aho atereje!» Mibambwe bimuuyamo arabyemera, biramubabaza cyane.

Inkuru igera kuri Muhangu, iwe mu Mvejuru. Abyumvise arahambira n'abe n'ibye, afumyamo aracika ajya i Burundi. Agezeyo akeza umwami waho, aramwakira, amushyira mu bapfumu be. Muhangu aratona cyane, ndetse ngo kurusha uko yari ameze mu Rwanda. Ubwo yari afite abana b'abadabagizi kuko bakuriye mu bukire, ariko bagakunda guhakwa n'ibwami, ndetse ngo ntibiyibutse no gusezera ngo batahe.

Bukeye Muhangu arabyitegereza, asanga abana be nta cyo bazimarira, ni bwo abasezereye ubwe barataha. Bamaze gutaha, na we arabakurikira abasanga iwe. Akigerayo, arabatumiza ngo baze kumwitaba. Bamaze kuhagera, atumiza abatoni be

n'abagaragu b'irimenanda; bose baraterana baba uruvange. Ahamagara abana be, arababwira, ati: «Bana bange kwikota ibwami si bibi; ibibi byanyu ni ukutagira icyo mubwira umwami mukimusaba! », ati: «Mubuze akandi kami kadahwanye n'umwami, ariko kakaba ari ko gatuma umuntu abana n'umwami neza!»

Abahungu be n'abagaragu be birabayobera, bararebana gusa. Muhangu abonye ko bajumariwe, ati: «Dore ako kami gato gashyikiriza umuntu ku mwami, ni umutima we». Bose batangarira irylo jambo Muhangu abatunguje, birahorwa.

Nuko hacyeho iminsi Muhangu arapfa, abana be basigara muri bwa butoni yabacumbiye. Bukeye, mukuru wabo akubaganya umugore w'umwami w'i Burundi baramufata; bimushyira mu makuba arabohwa aranyagwa, byototera na barumuna be; bose baranyagwa. Abagaragu ba Muhangu bamaze kubibona, bibuka rya jambo yasize avuze, bat: «Muhangu yabivuze ukuri koko 'Kami ka muntu ni umutima we!'» Yavuze ko umutima w'umuntu ari akami gato, umwami akabangikana na ko; ariko kakaba ari ko gatuma akunda nyirako!

Nuko rubanda babisamira hejuru ubwo, babona uwiyemeje icyo abandi bamuhinyuriraga, bat: «Nimumureke burya kami ka muntu ni umutima we!» Aho ni na ho kandi haturutse **«kwigira kami gato»** bivuga **kwigira ikigenge. Kami ka muntu** bivuga **umutima nama**.

IGICE CYA MBERE: KUMVA NO GUSESENGURA UMWANDIKO (amanota 15)

- 1) Iyi nkuru yabaye mu kihe kinyejana? Aho yabereye ubu ni mu kahe Karere k'u Rwanda? Mu yihe Ntara? **(amanota 3)**
- 2) Ukurikije uyu mwandiko: **(amanota 2)**
 - (a) Ni irihe zina ry'ubwami rya Mibambwe Sekarongoro?
 - (b) Muhangu yari muntu ki?
- 3) Abana ba Muhangu bazize ubusa. Ni byo cyangwa si byo?
Sobanura igisubizo cyawe. **(amanota 2)**
- 4) Muhangu yarashakaga kuvuga iki abwira abana be ko "Kami ka muntu
ari umutima we?" **(amanota 2)**
- 5) Inyunguramagambo : **(amanota 6)**
 - (a) Sobanura amagambo akurikira ukurikije ibisobanuro afite mu mwandiko.
- Umupfumu

- Kugisha
 - Kwikota
- (b) Uzuza kandi ukosore aho bishoboka izi nteruro ukoreshje amagambo akurikira dusanga mu mwandiko: ***gufumyamo, kwarama, gukeza, urwaho, kubyara.***
- Umujura aguciye..... yakwiba.
 - Ubu ababyeyi bajya kwa muganga.
 - Kariza yikanze abajura bamukurikiye maze ariruka.

IGICE CYA KABIRI: IKIBONEZAMVUGO N'UBUMENYI RUSANGE BW'URURIMI (amanota 15)

- 6) Vuga ubwoko bw'amagambo atsindagiye. **(amanota 3)**
 - (a) Wakwize **none** ugifite umwanya uhagije!
 - (b) Ibuye no mu mazi ngo: «**Dumburi!**»
 - (c) **Dore** ibyiza by'ikoranabuhanga!
- 7) Erekana intego n'amategeko y'igenamajwi yubahirijwe (mu mpine) by'amagambo atsindagiye muri iyi nteruro. **(amanota 4)**

Ububaji n'**ububoshyi** ni imwe mu myuga iboneka ahantu **henshi**.

- 8) Tanga ingero enye (4) z'ubuvanganzo nyemvugo bwo muri rubanda. **(amanota 4)**
- 9) Garagaza imigani y'imigenurano ihuye n'ibisobanuro bikurikira: **(amanota 4)**
 - (a) Ushoboye kwihangana agategereza agera ku kiza yashakaga.
 - (b) Imico myiza cyangwa mibi abantu bayikomora (bayica) ku babyeyi babo.
 - (c) Ni ngombwa kwemera kuvunika ukihanganira ingorane uhura na zo kugira ngo ugere ku cyo ugamije.
 - (d) Utahagurutse ngo arebe icyo ahandi bamurusha, ntamenya aho umukiro uherereye.

IGICE CYA GATATU: IHANGAMWANDIKO (amanota 10)

- 10) Hanga umwandiko ntekerezo wimirongo makumyabiri (20) uvuga ku byiza by'ikoranabuhanga mu iterambere. Ugaragaze byibuze ingingo enye zishygikira ibitekerezo byawe. **(amanota 10)**

.....**IHEREZO**.....

IMBONERA Y'IKOSORA (S4 ANDI MASHAMI)

IGICE CYA MBERE: KUMVA NO GUSESENGURA UMWANDIKO (amanota 15)

- 1) Iyi nkuru yabaye mu kinyejana cya 15 **(1)**. Aho yabereye ubu ni mu Karere ka Huye **(1)**, Intara y'Amajyepfo. **(1) (amanota 3)**
- 2) Ukurikije uyu mwandiko: **(amanota 2)**
 - (a) Izina ry'ubwami rya Sekarongoro ni Mibambwe I **(1)**.
 - (b) Muhangu yari umwe mu bapfumu b'abatoni b'umwami. **(1)**
- 3) Abana ba Muhangu bazize ubusa. Ni byo abana ba Muhangu bazize ubusa **(1)**kubera ko hakosheje mukuru wabo wakubaganyije umugore bituma na barumuna be bose babizira baranyagwa. Hagombaga guhanwa nyiri icyaha kuko icyaha ari gatozi. **(1) (amanota 2)**
- 4) Muhangu yashakaga kugira inama abana be yo kumvira umutima nama wabo, **(1)**kuko ari wo mwami muto kandi iyo utabashije kuwumvira ngo ukore ibikwiye, na wa mwami uhatsweho mudashobokana. **(1) (amanota 2)**
- 5) Inyunguramagambo : **(amanota 6)**
 - (a) Gusobanura amagambo akurikira ukurikije ibisobanuro afite mu mwandiko.
 - Umupfumu: umuntu uragura **(1)**
 - Kugisha: kwiherera k'umupfumu agashaka indagu **(1)**
 - Kwikota: kwikuba ahantu kenshi utahava **(1)**
 - (b) Kuzuza no gukosora aho bishoboka :
 - Umujura aguciye **urwaho** yakwiba. **(1)**
 - Ubu ababyeyi bajya **kwarama** kwa muganga. **(1)**
 - Kariza yikanze abajura bamukurikiye maze **afumyamo** ariruka. **(1)**

IGICE CYA KABIRI: IKIBONEZAMVUGO N'UBUMENYI RUSANGE BW'URURIMI (amanota 15)

- 6) Ubwoko bw'amagambo atsindagiye. **(amanota 3)**
 - (a) **none** : Umugerekwa w'igihe **(1)**
 - (b) **Dumburi** : inyigana **(1)**
 - (c) **Dore** : ikegeranshinga

7) Intego n'amategeko y'igenamajwi by'amagambo atsindagiye. **(amanota 4)**

ububoshyi : u-bu-boh-yi**(1)** h+y→shy **(1)**

henshi : ha-inshi **(1)** a+i→e **(1)**

8) Ingero z'ubuvanganzo nyemvugo bwo muri rubanda: imigani miremire **(1)**, ibitekerezo byo muri rubanda **(1)**, imigani migufi(imigenurano) **(1)**, insigamigani **(1)**, inanga zo muri rubanda, uturingushyo tw'abasizi, ibisingizo by'inyamaswa, ubuvanganzo bujyanye n'imyuga n'imihango....**(amanota 4)**

9) Imigani y'imigenurano ihuye n'ibisobanuro bikurikira: **(amanota 4)**

- (a) Ushoboye kwihangana agategereza agera ku kiza yashakaga. Uwitonze akama ishashi **(1)**
- (b) Imico myiza cyangwa mibi abantu bayikomora (bayica) ku babyeyi babo. Inyana ni iya mweru **(1)**
- (c) Ni ngombwa kwemera kuvunika ukihanganira ingorane uhura na zo kugira ngo ugere ku cyo ugamije. Imbuto y'umugisha yera ku giti cy'umuruho **(1)**
- (d) Utahagurutse ngo arebe icyo ahandi bamurusha, ntamenya aho umukiro uherereye. Akanyoni katagurutse ntokamenya iyo bweze **(1)**

IGICE CYA GATATU: IHANGAMWANDIKO (amanota 10)

10) **Ibikurikizwa mu gukosora umwandiko:**

Imbata: umutwe + intangiriro+ igihimba +umusozo **(amanota 2)**

Imyandikire (amanota 2)

Amakosa abiri atakaza **(0.5)** ni ukuvuga ko amakosa **8** abona **0/2**

Ingingo (amanota 6)

Ingingo 4 zivuga ku byiza by'ikoranabuhanga.